

PERNYATAAN DASAR KESELAMATAN DAN KESIHATAN PEKERJAAN

TENTERA LAUT DIRAJA MALAYSIA



بِسْمِ اللَّهِ الرَّحْمَنِ الرَّحِيمِ
السلام عليكم ورحمة الله وبركاته

SALAM SEJAHTERA DAN SALAM 1 TLDM

Semua *Navy People* yang terlibat dengan sebarang tugas atau pekerjaan dalam tentera laut mempunyai kewajipan ke atas keselamatan dan kesihatan diri mereka dan orang lain. Sebagai Panglima Tentera Laut, tanggungjawab utama saya adalah untuk menyediakan keupayaan tentera laut yang berkesan bagi menjamin keselamatan dan pertahanan maritim negara ini. Untuk mencapai matlamat ini, saya mesti menguruskan aktiviti-aktiviti dalam TLDM dengan berkesan. Tadbir urus keselamatan dan kesihatan *Navy People* yang baik adalah konsisten dengan tugas yang dimandatkan kepada saya, yang merangkumi:

- Memastikan warga TLDM memahami sepenuhnya kewajipan mereka yang berkaitan dengan aktiviti-aktiviti harian.
- Secara umumnya memahami bahaya dan risiko dalam aktiviti-aktiviti tersebut.
- Memastikan sumber yang sesuai dan secukupnya disediakan untuk mengawal secara sistematik bahaya dan risiko yang dikenal pasti

Pengalaman budaya keselamatan dan kesihatan yang proaktif ini tidak akan menghalang atau menghindar kita daripada memenuhi keperluan tugas dan tanggungjawab dalam sebarang jenis operasi sama ada di laut, darat ataupun udara. Kepercayaan dan keyakinan pihak berkepentingan terhadap keupayaan kita untuk sentiasa mengutamakan keselamatan anggota dan aset sekaligus kapasiti untuk mengekalkan kesiagaan yang tertinggi secara berterusan. Saya berkehendakkan semua *Navy People* memberi keutamaan kepada pengukuhan pembudayaan pencegahan di samping untuk menjaga kelengkapan dan aset-aset pertahanan bagi memperkasakan kesiapsiagaan TLDM. Matlamat utama saya adalah untuk memastikan amalan **Safety First Safety Always** menjadi sebatian dengan tingkah laku setiap Pegawai, Pegawai Waran, Bintara dan Lasykar serta warga awam yang berkhidmat dengan TLDM. Saya berkehendakkan setiap *Navy People* secara proaktif mengenal pasti bahaya dan risiko sama ada semasa di dalam ataupun di luar waktu kerja seterusnya menanganinya melalui tindakan pengawalan yang berkesan.

Justeru, saya berkehendakkan *Navy People*:

- Memahami tugas dan tanggungjawab terhadap keselamatan kesihatan yang berkaitan dengan peranan anda semasa melaksanakan tugas atau pekerjaan harian.
- Mengaplikasikan pendekatan pengurusan risiko keselamatan dengan mengenali bahaya dan mengambil kawalan pencegahan yang tepat, cepat dan berkesan.
- Mematuhi semua arahan, perintah dan perintah tetap tanpa memilih jalan pintas atau mengabaikan aspek keselamatan. Saya berkehendakkan semua arahan, perintah dan perintah tetap disediakan dengan mengutamakan elemen keselamatan dan kesihatan.
- Tidak menyalahgunakan peralatan dan bahan-bahan atau bersikap sambil lewa apabila melaksanakan tugas yang berisiko.
- Melaporkan keadaan bahaya atau situasi berisiko yang berkaitan dengan keselamatan dan kesihatan kepada penyelia sebaik sahaja ditemui/kenal pasti.

Saya juga berkehendakkan semua peringkat kepimpinan untuk memastikan:

- Anggota yang diselia memahami bagaimana mereka menyumbang kepada keselamatan semasa melaksanakan tugas dan tanggungjawab mereka sama ada di laut, darat ataupun di udara.
- Anggota memiliki kecekapan dan kelayakan yang bersesuaian dengan tugas atau pekerjaan yang dipertanggungjawabkan.
- Anggota berupaya mengenal pasti isu-isu keselamatan dan berani melaporkannya kepada pihak pimpinan ataupun penyeliaan dengan serta merta.
- Anggota menerima kesedaran keselamatan berserta latihan dan penyeliaan yang berkesan.
- Segala insiden dan bahaya yang dilaporkan diambil tindakan segera dan tepat pada masanya serta disiasat dengan terperinci.

Budaya Keselamatan dan Kesihatan Pekerjaan kita adalah untuk menggalakkan komunikasi dua hala dalam usaha memastikan pembelajaran daripada kesilapan dan menghindarkan ianya daripada berulang. Amalan pengurusan keselamatan yang proaktif memerlukan komunikasi dua hala yang berkesan bagi memastikan setiap keputusan yang dibuat adalah sesuai, betul dan tepat pada masanya. Dalam suasana perkhidmatan ketenteraan, ia sering memerlukan **KEBERANIAN** untuk tampil kehadapan dan menghentikan aktiviti yang berpotensi bahaya/hazard. **KEBERANIAN** ini adalah konsisten dengan Nilai Teras TLDM. **Jika sesuatu kelihatan tidak betul atau berpandangan ia tidak betul, ambil tindakan serta merta dengan memperbetulkan keadaan tersebut. Ini adalah tanggungjawab dan kewajipan anda serta saya, untuk berbuat demikian. Tindakan anda boleh menghalang malapetaka yang besar atau kecederaan mahupun kehilangan nyawa.** Kita dapat mencapai banyak perkara dalam persekitaran yang sering mencabar, walaupun kita berusaha mengejar kecemerlangan, kita mesti melakukannya tanpa mendedahkan *Navy People* dan aset-aset TLDM kepada bahaya/hazard dan risiko yang dapat dielakkan. Kita semua bertanggungjawab untuk keselamatan dan mesti bekerjasama untuk memahami dengan jelas bagaimana untuk mencapai satu hasil yang selamat dalam TLDM dengan membudayakan minda '**Safety First Safety Always**' di kalangan *Navy People* generasi semasa dan yang akan datang.

Saya mengucapkan terima kasih ke atas komitmen anda sepenuhnya dalam menjayakan inisiatif Keselamatan dan Kesihatan Pekerjaan TLDM.



TAN SRI AHMAD KAMARULZAMAN BIN HJ AHMAD BADARUDDIN
Laksamana
Panglima Tentera Laut

18 JANUARI 2018

